

•sawcuenh•

Caiqraen, Mbanjrungh Iq

再见，小山村

□ Danz Hijvah / 谭喜花

It

Veiz Linz riu aen daeh hung he, ndwn youq bakdou hagdangz.

Aen ranzlaeuz gaeuq sam caengz he daengj youq baihnaj, gwnz dingj-laeuz sij miz “Gij Gunghcwngz Yivu Gyauyuz Ranghdieg Guekgya Gungz-hoj”, gyoengq hagseng doegsaw sing goksadsad cienz hauej rwz daeuj.

Seiq lengq byasang goengq dem goengq sangvidvid, gij ranzyouq cax-cagcag, deng rin dat roxnaeuz faex heu cw hauej, loh ok saekdi ngauez, muengh bae yaek raen mbouj raen.

Boux lauxsae hajcib geij bi he, mbouj sang mbouj daemq, hwet miz di gungj, byoemgyaeuq miz di raizva, gipmuengz gvaqdaeuq caeuq Veiz Linz gaem fwngz.

Boux lauxsae neix riu doiq Veiz Linz naeuz: “Angqcoux Siujveiz lauxsae daeuj daengz, gou singq Dangz, dwg vunz mbanjrungh neix, gizneix yaucangj dwg gou, lauxsae hix dwg gou.”

Dangz lauxsae ciepdwk naeuz: “Gizneix heuhguh Runghfaiz, gou youq neix doekseng, youq neix maj-hung, caeux couh gvenq lo. Mbangj boux lauxsae ngamq daeuj it, ngeih aen haggeiz, naeuz gizneix baez hai dou couh raen bya, youh fwz youh caem, dingj mbouj ndaej couh deuz lo. Hix mbouj ndaej gvaig gyoengqde, seizneix lwgnyez noix, dingz lai dwg lwgdog, bohme h gyaecungh lai, majhung miz hong guh hix dij mbouj ndaej dwgrengz.”

Cuengq daeh ndei le, Veiz Linz doiq Dangz lauxsae naeuz: “Dangz lauxsae, mwngz daiq gou bae gyausiz yawjyawj ba.”

Aen laeuzsonhag neix miz sam caengz, moix caengz miz song aen gyausiz, caengz daih’ it caeuq caengz daihngaih guh sonhag, caengz daihsam ce hoengq ndwi, cuengq di doxgaiq wnq.

Veiz Linz caeuq Dangz lauxsae byaij hauej gyausiz, Dangz lauxsae hawj gyoengq hagseng gaisau Veiz Linz, gyoengq hagseng gwnz naj yienh ndaej gig doeksat, caez yawj coh Veiz Linz, naeuz: “Veiz lauxsae ndei!”

Veiz Linz doq riunyumnyum caeuq gyoengq hagseng gangj vah doq hauejsim daengz gokciengz baihlaeng gyausiz, haujlai aen habngaiz caez-cupcup baiz youq gizhaenx.

Dangz lauxsae lwnh Veiz Linz nyi: “Hagdangz gungh miz it nienzgaep daengz sam nienzgaep, miz samcib haj boux hagseng, gyoengqde daj gak aen mbanjrungh gyonj daeuj neix doegsaw.

Mbangj boux hagseng liz ranz gya, baedauq sam seiq aen cungdaeuq, moix ngoenz aeu daiq ngaiz byaek daeuj hagdangz gwn.”

Veiz Linz muengh gij faj naj ndeigyaez neix, sim naemj: Gou youq net gizneix lo, gou buenx sou caez majhung ba.

Ngeih

Veiz Linz ngamq ndaej sam bi, daxmeh couh baenz bingh gvaqseiq lo. Maj daengz haj bi, daxboh youq rog guhhong sawqmwh deng saehhux, youh vut Veiz Linz bae, ce de caeuq daxgoeng daxbuz gvaq saedceij.

Ranz roh youh bungz fwn lienz hwnz, Veiz Linz doeg daengz cuh-cungh, daxgoeng caeuq daxbuz youh laebdaeb biek de bae. Ndaw mbanj gyoengq beixnuengx caez ok cienz daeuj soengq Veiz Linz doegsaw, cig daengz de daihhag bizyez.

Veiz Linz ngamq ndaej ngeihcib sam bi, daihhag bizyez lo, de naemj bae naemj dauq, gietdingh dauqma mbanjranz sonhag, dang boux lauxsae ndeu.

Miz vunz riu naeuz, Veiz Linz doegsaw lai le, aen uk dauqfanj bienq huk bienq ngawz lo, bouxwnq muengh dai muengh lix cungj naemj bae ndaw singz guhhong, de cix gwq euq dauq lajmbanj, noix raen lo.

Veiz Linz naeuz: “Raggoek gou youq lajmbanj, mbanjranz miz gyoengq beixnuengx simsienh simndei gou, gou aeu ma mbanjranz guhhong.” Vunzwnq dingq le, bibi gyauej caiq hix mbouj miz vah gangj. Gyoengq beixnuengx ndaw mbanj dingq le, naeuz: “Lwg ha, raeuz gizneix lij suenq ndei, gizlawz engq gungzhoj mwngz couh bae gizde ba.”

Gij vah gyoengq beixnuengx, hawj aen sim Veiz Linz roxnyinh raeurubrub, de mbouj caiq lawq saekdi, boux ndeu aemq daeh daeuj Runghfaiz sonhag.

Miz haet ndeu, doek raq fwn hung he, gyoengq hagseng boux gonq boux laeng daengz hagdangz lo, lij miz daeg hagseng he caengz daengz.

Veiz Linz longz geu buhfwon he, dajsuenq okbae ciepdwk daeg hagseng, de byaij coh diuz lohgemh ngutngeuj lingqlangq. Seizneix lij doek fwn-moenq, gizgiz mbaeqsubsub youh wenqgywgywg, cik din Veiz Linz seiz mbouj seiz loemq roengz geh rin bae.

Veiz Linz doq byaij doq muengh, doq muengh doq heuh aen coh daeg hagseng haenx. Ndaw bya fwzrwgrwg, hix mbouj nyi sing duzroeg sing

duznyaen heuh. Sawqmwh, Veiz Linz dingqny i lajdat miz aen sing unqnyieg he han naeuz: “Veiz lauxsae, Veiz lauxsae, gou youq gizneix.”

Veiz Linz swonh sing heuh muengh roengz lajdat bae, raen daeg hagseng haenx boemzhoemj ninz youq ndaw caz oen, diuz gavaq baihsuix miz lwed iemq okdaeuq.

Daeg hagseng lwnh Veiz Linz nyi: “Loh raeuz lai, gouh haiz lajdin daenj nanz le, deng muz ndaej youh bingz youh wenq, byaij loh mbouj onj lo, mbouj hauejsim couh doek roengz lajdat bae.”

Veiz Linz duet geu buhfwon roengzdaeuq, hawj daeg hagseng daenj, menhmenh fuz de hwnjdaeuq, aemq de bae veiswngnyen.

Byaij le song aen cungdaeuq loh bya, cij daeuj daengz aen veiswngnyen bien goengloh. Seizneix, Veiz Linz gwnz ndang deng raemxfwn caeuq raemxhanh cimq ndaej dumzswdswd, faj naj hix bienq ndaej hoengzgyaemq, diemheiq baegfefe.

Veiz Linz naemj: Gij loh bya neix nanz byaij lai lo, Runghfaiz ciuh neix mbouj rox daengz seizlawz cij ndaej bienq ndei.

Mbat saeh neix le, Veiz Linz doiq Dangz lauxsae naeuz: “Gyoengq hagseng mbanjrungh gya haenx, ngoenz-naengz byaij baenz gya lohbya daeuj hagdangz, youq gwnz loh miz maz saeh cungj mbouj miz vunz rox. Mboujnex raeuz caeuq bohme h gyoengqde doxyaeng, heuh hagseng liz ranz gya haenx singhgizit daengz singhgizhaj daeuj hagdangz gwn youq.”

Dangz lauxsae dingq le, naeuz: “Siujveiz lauxsae ha, mwngz daeuj gizneix sonhag gaeng dwgrengz lo, lij aeu guenj gyoengq hagseng gwn youq dem, sinhoj lai bw.”

Veiz Linz naeuz: “Gou gaeng dawz hagdangz dangq aen ranz swheij, hix dawz gyoengq hagseng dangq lwg swheij.”

Gyoengq bohme hagseng dingz-lai youq rog dajgoeng, Veiz Linz caeuq Dangz lauxsae cug ranz cug ranz dwk dienhvah, caeuq gyoengqde doxyaeng. Gyoengq bohme hagseng dingq le, cungj gig angq, naeuz docih gyoengq lauxsae lo.

Aen laeuzsonhag caengz daihsam hoengq ndwi, couh aeu daeuj guh suzse. Gyoengq hagseng roen gya haenx cungj angqfwngfwng buen daeuj hagdangz youq lo.

Ranz caengz rongh seuq, Veiz Linz couh hwnqcong z cawj ngaizromh lo. Veiz Linz doq cawj ngaizromh doq swiq byaek cuengq ndei, banngaiz

cuengqhag couh ndaej roengz rek cawj byaek lo, gyoengq hagseng mbouj nguh seiz gwn hix mbouj nguh seiz yietnaiq.

Gyoengq hagseng daengz donq couh ndaej gwn, yietnaiq ndaej gaeuq, hwnjdaengz hix hag rox ndaej vaiq, gij cingzcik gyoengq hagseng gak aen nienzgaep youq ndaw yanghecin baiz mingz cungj dwg daih’ it, ndaej lingj-dauj haenh mbouj daengx bak, Veiz Linz simhai dangqmaz, roxnyinh swheij guh ndaej dij raixcaix.

Sam

Ngamq daengz hagdangz mwhe, Veiz Linz ndaem gaiq reihbyaek iq he, gaeuq cihgeij gwn, lij ciengx geij duz gaeq lwg gwn di ngaiz lw byaek lw. Seizneix dem baenzlai hagseng caez gwn ngaiz, Veiz Linz youh youq baihlaeng hagdangz haifwz, naemj lai ndaem di byaekheu, de ngoenz baez ndaejhoengq couh gwed gvak bae guhhong. Gyoengq hagseng raen le, hix caeuq de caez bae gvak reih, mbouj nanz gaiq reih byaek hung he couh guh baenz lo. Caiq gvaq mboengq he, gaiq reih byaek couh bienq ndaej heuswdswd lo.

Duenh seizgan ndeu, Veiz Linz roxnyinh hwnjdaengz seiz, mbanj hagseng lwgda mbouj dwg muengh neix muengh haenx, couhdwg raninz boemz gwnz daizsaw, mbouj hauejsim hwnjdaengz.

Veiz Linz fwt naemj daengz, dwg mbouj dwg gyoengq hagseng yingz-yangj gaen mbouj hwnj lo, cij bienq ndaej baenzneix?

Mboengqneix, gizgiz duzmou baenz binghra, baenz buek baenz buek dai bae, gyoengqvunz aeu ci rag bae haem cungj mbouj ndaej gib, canghdoz hix mbouj raen dawz nohmou daeuj mbanjrungh gai, yaek cawx couh deng byaij ok rog bya bae. Baihrog miz saekdi nohmou gai, hix bengz ndaej hawj vunz da biengj, gaen ngeihcib geij samcib geij maenz, cawx ndaej saekdi gaijngah couh mbouj loek lo. Nohbit, nohgaeq caeuq nohbya yienznaeuz mbouj suenq bengz, hoeng gwn lai hix mbwq, lumjnaeuz nanz mbouj ndaej gwn nohmou, gwn maz cungj mbouj miz feih, vunz hix unq-nyieg lumj gomungz nei, mbouj miz rengz. Gaxgonq, ngoenz boux hagseng ndaej boujdiep seiq maenz ngaenz, Veiz Linz lij ok cienz swheij daeuj cawx haux caeuq noh dem, seizneix nohmou baenzneix bengz, engq mbouj ndaej gwn geijlai lo.